



IORDANIYA BILAN SAMARALI HAMKORLIKNI FAOLLASHTIRISH MASALALARI MUHOKAMA QILINDI

O‘zbekiston Respublikasi Prezidenti Shavkat Mirziyoyev 6-iyul kuni Iordaniya Hoshimiylar Podshohlighi Bosh vaziri o‘rinbosari, tashqi ishlar va muhojirlar masalalari bo‘yicha vaziri Ayman Husayn Safadiy boshchiligidagi delegatsiyani qabul qildi.



Suhbat avvalida yuqori martabali mehmon davlatimiz rahbariga Iordaniya Podshohi Abdulla II ibn al-Husaynning samimiy salomi va tilaklarini yetkazdi.

Uchrashuvda O‘zbekiston bilan Iordaniya o‘rtasidagi ko‘p qirrali hamkorlikni kengaytirishning dolzarb masalalari muhokama qilindi.

O‘tgan yili Samarqandda oliy darajada

o‘tgan sermahsul muzokaralar ikki tomonlama munosabatlar tarixida yangi sahifa ochgani mamnuniyat bilan qayd etildi.

Erishilgan kelishuvlar doirasida joriy yilda parlamentlararo do‘stlik guruhlar tuzildi, Hukumatlararo qo‘shma komissiyaning ilk yig‘ilishi o‘tkazilib, Ishbilarmonlar kengashi ta‘sis qilindi, shuningdek, havo qatnovlari yo‘lga qo‘yildi.

Kelgusida siyosiy muloqotlarni faollashtirish, savdo-iqtisodiy, investitsiyaviy hamda madaniy-gumanitar sohalarida qo‘shma loyiha va dasturlarni ilgari surishga alohida e‘tibor qaratildi.

Shuningdek, dolzarb xalqaro va mintaqaviy masalalar yuzasidan fikr almashildi.

O‘zA

O‘ZBEKISTON PREZIDENTI QOZOG‘ISTONNING BIRINCHI PREZIDENTINI TABRIKLADI

O‘zbekiston Respublikasi Prezidenti Shavkat Mirziyoyev 6-iyul kuni telefon orqali muloqotda Qozog‘iston Respublikasining birinchi Prezidenti Nursulton Nazarboyevni tavallud kuni bilan samimiy tabriklab, unga mustahkam sog‘liq, baxt-saodat va uzoq umr tiladi.

Davlatimiz rahbari Nursulton Nazarboyevning zamonaviy Qozog‘istonning barpo etilishi, Markaziy Osiyoda mintaqaviy hamkorlikni ilgari surish hamda O‘zbekiston — Qozog‘iston strategik

sheriklik va ittifoqchilik munosabatlarini mustahkamlashga qo‘shgan ulkan hissasini alohida e‘tirof etdi.

O‘zbekiston bilan Qozog‘iston o‘rtasidagi mustahkam do‘stlik, yaxshi qo‘shnichilik va

o‘zaro ko‘mak rishtalariga asoslangan ko‘p qirrali hamkorlikning bugun yuqori sur‘atda rivojlanib borayotgani mamnuniyat bilan qayd etildi.

O‘zA

CHO‘LLANISHGA QARSHI KURASHISH VA SHAHARSOZLIKDA EKOLOGIK TALABLAR KUCHAYTIRILADI

Prezident Shavkat Mirziyoyev cho‘llanishga qarshi kurashish va cho‘l iqtisodiyotini rivojlantirish, shuningdek, shaharlarda “yashil shahar” tamoyillarini joriy etish yuzasidan takliflar taqdimoti bilan tanishdi.

Iqlim o‘zgarishi, suv tanqisligi, yerlarning tanazzulga uchrashi va cho‘llanish bugun butun mintaqa uchun dolzarb ekologik muammoga aylanmoqda. Bu esa qishloq xo‘jaligi barqarorligi, oziq-ovqat xavfsizligi, aholi salomatligi va hududlarning iqtisodiy rivojlanishiga bevosita ta‘sir ko‘rsatmoqda.

Mamlakatimiz hududining qariyb 80 foizi cho‘l va yarim cho‘l maydonlaridan iborat. Yerlarning sho‘rlanishi, qum ko‘chishi, chang bo‘ronlari va garmsellar, ayniqsa, Qoraqalpog‘iston Respublikasi, Buxoro, Navoiy, Xorazm viloyatlari, shuningdek, Qashqadaryo, Surxondaryo va Jizzax

viloyatlarining ayrim tumanlarida jiddiy xavf tug‘dirmoqda.

Orol dengizining qurishi mazkur jarayonni yanada kuchaytirgan. Qurigan tubda Orolqum cho‘li shakllanib, havoga ko‘tarilayotgan tuz va chang keng hududlarga tarqalmogda.

Davomi 2-beta

NEFT-GAZ TARMOG‘INI KUZ-QISH MAVSUMIGA TAYYORLASH ISHLARIGA ALOHIDA E‘TIBOR QARATILDI

Prezident Shavkat Mirziyoyev neft-gaz tarmog‘ida navbatdagi kuz-qish mavsumiga tayyorgarlik ishlarining borishi yuzasidan axborot bilan tanishdi.

2026-2027-yillar kuz-qish mavsumida aholi, ijtimoiy soha obyektlari va iqtisodiyot tarmoqlarini energiya resurslari bilan barqaror ta‘minlash maqsadida ishlab chiqilgan kompleks chora-tadbirlar ko‘rib chiqildi. Tabiiy va suyuqlirilgan gaz yetkazib berish, magistral

va hududiy gaz tarmoqlarini ta‘mirlash, yoqilg‘i zaxiralarini shakllantirish hamda avariya-tiklash brigadalarning shayligini ta‘minlash bo‘yicha aniq vazifalar qo‘yildi.

Tabiiy gaz ta‘minoti tizimini mavsumga tayyorlash ishlariga alohida e‘tibor qaratildi.

Jumladan, mavsumgacha magistral gaz quvurlarining 53,7 kilometr nuqsonli qismini almashtirish, kompressor stansiyalaridagi 77 ta gaz haydash agregatini mukammal ta‘mirlash rejalashtirilgan.

Davomi 2-beta

Yangi loyiha

YANGI O‘ZBEKISTON: SHIDDATLI EVRILISH VA REAL NATIJALAR MANZILI

“Yangi O‘zbekiston” gazetasining ijodiy jamoasi vodiyning eng so‘lim go‘shalaridan biri — Farg‘ona viloyatida!

Xabaringiz bor, gazetamizda “Yangi O‘zbekiston: shiddatli evrilish va real natijalar manzili” nomli yangi loyihani boshlagan edik. Ushbu loyiha bilan mamlakatimizda erishilayotgan natijalar tahlili orqali qisqa vaqtda qanday katta tarix yaratilayotganini ochib berishni maqsad qilgandik.

Ushbu loyihada dastlab Qoraqalpog‘iston Respublikasidagi o‘zgarishlar haqida bir qancha tahliliy maqolalar e‘lon qilindi. Ya‘ni “Yangi O‘zbekiston” gazetasining bitta soni to‘liq ushbu hududning o‘n yillik taraqqiyot yo‘liga bag‘ishlangan edi.

Loyiha maqsadiga ko‘ra, “Yangi O‘zbekiston” gazetasining ijodiy jamoasi mamlakatimiz bo‘ylab olis qishloq va ovullardagi o‘zgarishlar, shaharlarning yangilangan qiyofasi bilan yaqindan tanishadi. Ziyolilar, yoshlar, faollar va oddiy insonlar bilan suhbatlashib, ularning dil so‘zlariga quloq tutadi. Shu asosda real hayotiy hikoyalar orqali islohotlar ko‘lamini ochib berishga harakat qiladi.

Ayni maqsadda yo‘lga chiqqan ijodiy jamoaning navbatdagi manzili Farg‘ona viloyati bo‘ldi. Ochiq ko‘ngil, samimiy, hunarmand, ishbilarmonlar diyori bo‘lgan viloyatga safarimiz hayajonli taassurotlar va quvonchli voqealarga boy bo‘ldi. Avvalo, xalqimizning yirik ziyolilarini kamol topirtirgan xalq bilan samimiy muloqotdan juda katta hayotiy hikmatlarni o‘rgandik. Qolaversa, mamlakatimizdagi izchil islohotlarning ana shu samimiy va daryodil insonlar hayotidagi natijasini ko‘rib ko‘nglimiz faxrga to‘ldi.

Biz quyidagi haqiqatni takror bo‘lsa-da, eslatmoqchimiz: mamlakatimiz Yetakchisining siyosiy irodasi sabab qisqa vaqtda katta tarix yaratildi. Natijada inson qadrini ulug‘lashga qaratilgan islohotlar nafasi olis qishloq va ovullarga ham kirib bordi. Mazkur o‘zgarishlarni farg‘onaliklar ham real vaqt rejimida, o‘z hayotlari misolida ko‘rib, quvonib yashamoqda ekan.

Farg‘ona ahlining farovon hayoti, bugunidan ko‘ngli to‘lib, ertangi kuniga katta rejaralar bilan yashayotganiga shohid bo‘lgach qalbimiz ilhomga to‘lib, uni Siz, aziz o‘quvchilar bilan o‘rtoqlashish maqsadida bir nechta tahliliy maqolalar uyushtirdik. Ana shu qizg‘in jarayonda angladikki, bu bitiklar Farg‘onadagi islohotlarning o‘ndan, ehtimol, yuzdan birini ochib berishga qodir ekan. Shu bois, loyihada imkon qadar ko‘proq yo‘nalish, sohani qamrab olishga, ulardagi eng muhim jihatlarni ochib berishga urindik.

Umid qilamizki, Farg‘ona viloyatidagi o‘zgarishlarga bag‘ishlangan bugungi tahliliy maqolalar orqali ushbu zamindagi islohotlar ko‘lamini anglab, ularning quvonchini yurakdan his etasiz.

Tahririyat

O‘zbekiston Respublikasi mustaqilligining 35 yilligiga



VODIY GAVHARI: IQTISODIY O‘SISH VA MA’NAVIY YUKSALISHNING FARG‘ONACHA FORMULASI

Farg‘ona viloyati hokimi Xayrullo BOZOROV bilan “Yangi O‘zbekiston” va “Pravda Vostoka” gazetalari bosh muharriri Salim DONIYOROV suhbatlari

O‘tgan tarixan qisqa, ammo mazmunan asrlarga tatigulik davrda xalqimiz “Yangi O‘zbekiston” g‘oyasi va Uchinchi Renessans poydevorini yaratishdek buyuk maqsadlar atrofida jipslashdi. Prezidentimiz rahbarligida amalga oshirilayotgan keng ko‘lamli islohotlar zamirida, eng avvalo, “Inson qadri uchun” degan ulug‘vor tamoyil mujassam bo‘lib, uning amaliy ifodasini har bir yurtdoshimiz o‘z hayotida, kundalik turmush tarzida topmoqda. Bugun yurtimizning qay bir hududiga bormang, shiddatli bunyodkorlik va yangilanishlarga guvoh bo‘lasiz. Ayniqsa, vodiylar bo‘lmish Farg‘ona viloyatida iqtisodiy yuksalish, investitsiyaviy jozibadorlik va ijtimoiy sohalaridagi ulkan o‘zgarishlar milliy taraqqiyotimizning yorqin ko‘zgusiga aylandi.

Davlatimiz rahbari tomonidan ilgari surilgan xalqni rozi qilish, tadbirkorlikni qo‘llab-quvvatlash va hududlarni kompleks rivojlantirish g‘oyasi bugun Farg‘ona zaminida yuqori sur‘atda yangicha mazmun kasb etmoqda. Farg‘ona viloyati hokimi Xayrullo BOZOROV bilan suhbatimiz ana shunday qutlug‘ yangilanishlar, hudud ijtimoiy-iqtisodiy hayotidagi o‘zgarishlar hamda istiqboldagi ustuvor vazifalar haqida kechdi.

— Xayrullo Hayitboyevich, Prezidentimiz joriy yilning 27-28-aprel kunlari Farg‘ona viloyatiga tashrifi chog‘ida iqtisodiyot, sanoat,

eksport, investitsiya hajmini oshirish bo‘yicha ko‘plab topshiriqlar berdi. Ularning ijrosi qanday amalga oshirilayotgani to‘g‘risida so‘zlab bersangiz.

— Davlatimiz rahbarining viloyatimizga tashrifi bir qarashda oddiy voqeadek ko‘rinadi. Chunki Prezidentimiz joylardagi islohotlar, aholi turmush tarzi, bunyodkorlik ishlari bilan tanishish uchun barcha hududlarga borib turadi. Biroq biz uchun Farg‘ona viloyatiga tashrifning o‘rni, ahamiyati har doim o‘zgacha. Negaki Prezidentimizning

27-28-aprel kunlaridan oldingi tashrifi chog‘ida tilga olingan raqamlar bugunga kelib hayotiy haqiqatga aylandi. Yangi tashrif viloyat rahbariyati, mas‘ullari oldiga yanada ulkan vazifalar qo‘ydi.

Oxirgi yillarda Farg‘ona viloyatidagi tizimli islohotlar o‘zining samaralarini ko‘rsatmoqda. Yer va qazilma boyliklar cheklangan bo‘lishiga qaramay, hududda iqtisodiyotni diversifikatsiya qilish, sanoat, qishloq xo‘jaligi, xizmatlar va axborot texnologiyalari sohalarida barqaror o‘sinh ta‘minlandi. Investitsiya va tashqi savdo

sohasida ham sezilarli o‘sinhga erishildi. Eksport hajmi izchil oshdi, eksportchi korxonalarning soni ko‘paydi.

Birgina misol: davlatimiz rahbarining 2024-yil 16-dekabrda Farg‘ona viloyatini ijtimoiy-iqtisodiy rivojlantirishga doir qaroriga muvofiq, 2025-yilda Quvasoy shahrida “Crown Ceramic” qo‘shma korxonasi tashkil etildi. Yiliga 8 million kvadrat metr keramik granit plita ishlab chiqarishga mo‘ljallangan loyiha 1 trillion so‘mlik mahsulot tayyorlash, 665 milliard so‘mlik qo‘shilgan qiymat yaratish va 35 million dollarlik eksportni amalga oshirish imkoniyatlariga ega. Bu yerda ishlab chiqarilayotgan keramik plitalar sifati va texnik ko‘rsatkichlari bo‘yicha Italiya, Ispaniya va Xitoy mahsulotlari bilan raqobatlasha oladi. Joriy yil yanvar-mart oylarida korxona Qirg‘iziston va Tojikistonga 400 ming dollarlik 80 ming kvadrat metr mahsulot yetkazib berdi.

Davomi 3-beta

